

## **АКАФИСТ**

### **СВЯТОЙ БЛАЖЕННОЙ ЕКАТЕРИНЕ ПЮХТИЦКОЙ**

*(для келейного чтения)*

#### **Кондак I**

**Избранной** угоднице Христовой, / звездой богосветлой на небосводе обители Пюхтицкой возсиявшей, / даром прозорливости и чудотворения одаренной, / Престолу Царя Славы ныне со ангелы и всеми святыми предстоящей, / благодарственная пения приносим ти, блаженная мати, / ты же яко имущая дерзновение ко Господу, / от всяких нас бед и скорбей свободдай да зовем ти хвалебно: // Радуйся, святая блаженная мати Екатерино, обители Пюхтицкия похвало и утверждение.

#### **Икос I**

**Ангелов Творец** произрастí ты, прехвальная мати, в последняя времена сия в предéлах земли Балтийстей, идéже бе рожденá, воспитána и в делании иночестем до конца дней подвизалася еси. Мы же, взирающе на равноангельное житие твое, возвышаемся душа́ми и добродетелем твоим подража́ти тщашеся, вопием ти:

**Радуйся**, рода знатнаго, благу России много послужившаго отрасль пречестна́я:

радуйся, родителями благочестивыми в Православии воспитáнная.

**Радуйся**, от святых купели «Екатериною», сýречь, «всегда чистою», наречéнная:

радуйся, многими добродéтелями Богом одарéнная.

**Радуйся**, милости и сострадания к людям и всякому творению Божию от молодых лет преиспóлненная:

радуйся, и нас делами милосердия служить Богу и людям научающая.

**Радуйся**, святая блаженная мати Екатерино, обители Пюхтицкия похвало и утверждение.

#### **Кондак 2**

**Видя** Господь душу твою, яко ниву ко плодоносию духовному возделанную, от юности направи ум твой к исканию единого на потребу, да принесеши сторичный плод, непрестанно вопиюще Богу: Аллилуиа.

## **Икос 2**

**Разум имуща свыше просвещенный, Екатерино богомудрая, скорогибнущих благ мира сего отверглася еси и угождение Богу паче всего возлюбивше, неленостно Тому во всем житии твоём послужила еси, сего ради ублажаем тя, зовуще сице:**

**Радуйся, от младёнства по предувёдению Богом избранная: радуйся, молитвеннице теплая Богом нам дарованная.**

**Радуйся, северных пределов российския страны строгое и светлое воспитание: радуйся, земли Эстонстей похвалó и украшение.**

**Радуйся, в житии твоём Евангельския заповеди исполнившая: радуйся, сестрою милосердия во дни брани кровопролётныя послужившая.**

**Радуйся, святая блаженная мати Екатерино, обители Пюхтицкия похвало и утверждение.**

## **Кондак 3**

**Сила Вышняго укрепляше дух твой, егда ты, в буреносныя годы лихолетия, от стóльнаго града Петрова изшедше, пресельница была еси в земли Эстонстей и притекла еси во обитель Пюхтицкую, идеже многия подвиги иночестии и крест юродства подъяла еси: мы же, прославляюще терпение и труды твоя, дивная мати, вопием о тебе Богу: Аллилуиа.**

## **Икос 3**

**Имуще всегда пред очима своима Господа рекшаго: «Аще заповеди Моя соблюдете, пребудете в любви Моей», ты, прехвальная мати, заповеди Христовы в житии опасно храняще, любовь к Богу и ближним стяжала еси. Приведи молитвами твоими, и нас, хладных, но призывающих тя в помощь, к Божией любви, да во умилении зовем ти:**

**Радуйся, серафимскою пламенною любовью к Богу горевшая: радуйся, ближних своих паче себе возлюбившая.**

**Радуйся, милостивым сердцем твоим страждущим и немощным сострадавшая: радуйся, вся скорби их в сердце свое широкое вместившая.**

**Радуйся, инокиням наставнице богомудрая: радуйся, цвете благий и прекрасный целомудрия.**

**Радуйся, святая блаженная мати Екатерино, обители Пюхтицкия похвало и утверждение.**

#### **Кондак 4**

**Б**уря искушений и козней вражиих не возможе поколебати хра́мины души твоея, блаженная мати, основана́ бо бѣ на твердем камене веры во Христа. Укрепляема же Божественною благодатию и молитвами непрестанными хранима, непреткновенно востекала еси ко ангельскому житию по стезям добродетелей, дѣжде достигла еси вечноблаженнаго пристанища спасения, идеже со ангелы и всеми святыми поеши Богу: Аллилуиа.

#### **Икос 4**

**С**лышаша мнози, яко чудный прозрения дар от Бога прияла еси, уже при жизни твоей людие Божии называше тя Екатериной Пюхтицкой, и потекоша отсюда к тебе с недоуменьми, скорбьми и печальми своими и помощь благовременну приемше, прославиша Господа и тя благодариша, зовуще:

**Р**адуйся, от юности разум свой Христу покорившая:  
радуйся, равноангельное житие на земли явившая.

**Р**адуйся, светлостию жития Богу угодившая:  
радуйся, вопрошавших тя богомудренно наставлявшая.

**Р**адуйся, яко тобою по мере веры подаются благодатныя исцеления:  
радуйся, яко везде призывающия тя скоро предваряеши.

**Р**адуйся, святая блаженная мати Екатерино, обители Пюхтицкия похвало и утверждение.

#### **Кондак 5**

**Б**оготечная пресветлая звезда явилася еси в земли Эстонстей, блаженная мати, озаряюще гору Пюхтицкую лучами твоих добродетелей и дарований божественных. Темже ныне сияеши на небесех славою вечною с лики праведник и наставляеши всех, к тебе с верою притекающих, на путь к небесному отечеству ведущий, вопиющих Богу: Аллилуиа.

#### **Икос 5**

**В**ѣдая, яко жизнь zde дана нам для благоугождения Богу, ты, богомудрая мати, вся красная мира сего презрѣвши, Единому Господу неленостно послужила еси и от Того дар благодатныя помощи содевати знамения и чудеса прияла еси и тем ближним послужила еси. Сего ради восхваляем Бога, даровавшего тебе благодать такую и умильно зовем ти:

**Радуйся, Единого Христа от всего сердца возлюбившая:  
радуйся, Тому Единому с мудрыми девами последовавшая.**

**Радуйся, яко молитвами твоими всех к Богу приводиши:  
радуйся, яко правый путь ко спасению указуеши.**

**Радуйся, яко чистая сердцем Бога всегда зревшая:  
радуйся, всех утешать, а себя не жалеть тако учившая.**

**Радуйся, святая блаженная мати Екатерино, обители Пюхтицкия  
похвало и утверждение.**

### **Кондак 6**

**Проповедницы чудных деяний твоих, блаженная мати, явишася  
мнози: поспешать бо на помощь страждущим во всем житии твоём  
навыкла еси, о немощных же и от Церкви отпадших во дни обстояния,  
наипаче попечение имела еси. Сего ради зовем ти: утверди и нас в вере  
православней всегда пребывати да вопием с тобою Богу: Аллилуиа.**

### **Икос 6**

**Возсияла еси во обители Пюхтицкой яко богосветлое светило, во дни  
оскудения веры и отступления от Бога: сердца, неверием омраченныя,  
светом Божиим просвещающе и к Богу приводяще. Темже воспеваем ти сия  
похвальныя словеса:**

**Радуйся, усердно призывающим тя помогающая:  
радуйся, гнев Божий скоро на милость прелагающая.**

**Радуйся, яко твои молитвы сильны и многомощны Бога умилоствляти:  
радуйся, яко вся козни вражии смирением побеждала еси.**

**Радуйся, покровительнице наша Богом дарованная и молитвеннице:  
радуйся, обители нашея неотступная хранительнице.**

**Радуйся, святая блаженная мати Екатерино, обители Пюхтицкия  
похвало и утверждение.**

### **Кондак 7**

**Восхотевшу безбожным святыю обитель на горе Пюхтицкой разорити  
и место сие поруганию предати, не остави Господь в печали сущих раб  
Своих: воздвиже бо тя, угодницу Свою, прехвальная мати, да возложше на  
ся сугубый пост и молитвы, в затворе вся дни Святыя Четырдесятницы  
пребываеши. Сего ради прославляюще подвиги твои и терпение многое,  
благодарне вопием о тебе Богу: Аллилуиа.**

## **Икос 7**

**Новую** ты видим избранницу Божию, дерзновенную ходатаицу пред Престолом Господним и скорую в бедáх помощницу: исповедуем дивное заступление твое, прехвальная мати, егда обитель сию, в беде и брани от безбожных сущей, молитвою непрестáнною и зéльным пощёнием от закрытия сохранила еси, и минувше беде, паки всерадостный пасхальный трезвон огласи окрестности Куремяз. Темже от верных прими благохваления таковая:

**Радуйся**, злых богоборцев, чающих упразднить святую обитель, посрамившая:

радуйся, обитель в Пюхтице чудесно от закрытия сохранившая.

**Радуйся**, самоотвержение всецелое явившая:

радуйся, на уединенную молитву в лес многажды уходившая и в посте тамо пребывавшая.

**Радуйся**, ложем своим землю в лесу избравшая:

радуйся, за подвиги твоя на Небеси венчанная.

**Радуйся**, святая блаженная мати Екатерино, обители Пюхтицкия похвало и утверждение.

## **Кондак 8**

**Стáнницею** во юдóбли земной бывше, блаженная мати, все желание ко Владыце Христу вперéла еси, вся тленная за уметы вменивши, пустынное блаженное житие возлюбила еси, и наследнице Иерусалима Небеснаго явилася еси, в немже со Ангелы и всеми святыми ныне поеши Богу: Аллилуиа.

## **Икос 8**

**Всю** себе предавши в волю Божию, исполнилася еси даров Святаго Духа, и вместилище великой любви была еси. Толéко распространила еси сердце свое любовью Христовою, яко нетесно вмещалось в него множество почитавших тя человек и вся их скорби, якоже и сама рекла еси: «Когда я отдала ум свой Господу, сердце мое стало широким-широким». Сего ради хвалебно зовем ти:

**Радуйся**, в сердце свое широкое всю боль чужую вместívшая: радуйся, многообразныя кóзни лукаваго силою Божиею победившая.

**Радуйся**, крест юродства волею на себя подъявшая и многия лишения Христа ради претерпевшая: радуйся, келии не имевшая, якоже и Христос не име где главу подклонити.

**Радуйся, наставления в делании духовном от богомудренныя старицы Елены восприявшая: радуйся, сугубую благодать тоя старицы унаследовавшая.**

**Радуйся, святая блаженная мати Екатерино, обители Пюхтицкия похвало и утверждение.**

### **Кондак 9**

**Всякия утоли болезни, блаженная мати Екатерино, скорая бо в бедáх и напастех помощнице и дерзновенная молитвеннице пред престолом Божиим еси. Сего ради на твое ходатайство надеющися, Богу в тебе дивно прославляемому, непрестанно вопием: Аллилуиа.**

### **Икос 9**

**Витийство человеческое не довлеет изрещи обилие радости духовныя, еюже преисполнилася еси, мати всехвальная, егда в видении светозарном, Владычицу мира на источнице святем нощию в пургу и мраз мно́гажды зрети сподобилася еси. Темже убо дивящися сему пречудному видению зовем ти:**

**Радуйся, в тихое пристанище спасения на гору Богородицкую в Пюхтицу притекшая:  
радуйся, обитель Пюхтицкую, Божией Матерью в жребий Свой земный избранную, всем сердцем возлюбившая.**

**Радуйся, яко лицезрети Пречистую Богоматерь на святем источнице мно́гажды сподóбившаяся:  
радуйся, благодатию Святаго Духа зимою чудесно согреваемая.**

**Радуйся, яко молитвенным твоим предстательством от всех бед обитель ограждаеши:  
радуйся, заступнице и упование наше.**

**Радуйся, святая блаженная мати Екатерино, обители Пюхтицкия похвало и утверждение.**

### **Кондак 10**

**Спасти хотяще душу свою и чистоту душевную и телесную возлюбívше, многия добродетели в себе совокупила еси, мати всехвальная: многотрудныя бо подвиги иночества и юродства Христа ради на ся**

подъяла еси. Темже ныне в чертбѣзех небесных со святыми водворѣяся, поминай всех нас, чтующих память твою и Богу вопиющих: Аллилуиа.

### **Икос 10**

**С**тена и покров была еси при жизни, блаженная мати, всем к твоему скорому заступлению прибегающим, темже и ныне в бедѣх, болезнех и скорбех сущим помогай, да с верою и любовью зовем ти:

**Р**адуйся, суету мира сего и вся благѣ его презревшая:  
радуйся, мнимым безумием сияние благодати в сердце своем сокрывшая.

**Р**адуйся, всякое о себе отвергшая попечение:  
радуйся, подвижнице, не давшая на ложе себе отдохновения.

**Р**адуйся, яко многия искушения претерпевши, многим искушаемым помогаеши:  
радуйся, в бедѣх и скорбех скорая помощнице.

**Р**адуйся, святая блаженная мати Екатерино, обители Пюхтицкия похвало и утверждение.

### **Кондак 11**

**П**ение хвалебное возглашаем ти, богомудрая мати, небесное бо на земли стяжавше жительство, до конца жития твоего живуую, в юродстве сокрытую, нежно любящую людей душу соблюла еси. Дар прозрения, дар исцелений стяжавши, многими чудотвореньми Бога прославила еси. Мы же дивящися твоим чудесем, действием Святаго Духа являемым, вопием Господу сил: Аллилуиа.

### **Икос 11**

**С**ветозарную свещу, во мраце жития сущим, зрим тя, преподобная мати. Темже поминающе блаженное успение твое, и вечное твое на небеси и на земли прославление, с радостию приносим ти таковая:

**Р**адуйся, под покровом Божией Матери подвиги твоя творившая:  
радуйся, Отечества небеснаго Иерусалима горняго присно взыскавшая.

**Р**адуйся, почитательницу твою из Кронштадта, силою и действием Святаго Духа от лютаго недуга избавльшая:  
радуйся, слово с благодатию: «Бог даст и пройдет» ей изрѣкшая.

**Р**адуйся, яко последовательнице была еси жен святых и в неделю жен-мироносиц во обители Горняя отшедшая:  
радуйся, яко и по преставлении твоем нас не оставляеши.

**Радуйся, святая блаженная мати Екатерино, обители Пюхтицкия похвало и утверждение.**

### **Кондак 12**

**Благодать свыше ти данную, изливаеши обильно всем чтущим память твою и к заступлению твоему чудному притекающим, блаженная мати Екатерино. Темже и мы, грешнии, припадаем ко святым мощем твоим, преклоняюще колена сердец наших, молимся тебе усердно: от всяких нас бед, недугов, скорбей и козней вражиих избави, вопиющих Богу: Аллилуиа.**

### **Икос 12**

**Поюще равноангельное житие твое, дивная же и преславная чудеса, восхваляем тя, преподобная мати, обаче не могуще достойно изобразити славу твою и величие твое, со умилением зовем ти сие:**

**Радуйся, мощи твоя яко драгоценную святыню нам оставившая: радуйся, многих чудес подательнице к раце твоей с верою и любовию притекающим.**

**Радуйся, высокими добродетельми и преславными чудесы преукрашенная: радуйся, яко обитель Пюхтицкая именем твоим красуется.**

**Радуйся, яко монахов лица покровительницу ты свою именуют: радуйся, яко ныне предстоиши престолу Всех Царя, Христа Бога и за ны молишися.**

**Радуйся, святая блаженная мати Екатерино, обители Пюхтицкия похвало и утверждение.**

### **Кондак 13**

**О святая блаженная мати Екатерино, в бедях и скорбех сущим скорая помощнице и обители Пюхтицкая неусыпная молитвеннице! Приими от нас недостойных хвалебное сие пение, и благоприятными твоими к Богу молитвами, избави нас от всех бед временных и вечных: да сподобимся с тобою в Царствии Небеснем вечно воспевати: Аллилуиа!**

**Кондак сей глаголи трижды.**

**И паки 1-й икос и 1-й кондак**



## МОЛІТВА

### ко святѣй блаженней Екатери́не Пю́хтицстей

**О**, святая блаженная ма́ти Екатери́но! Душе́ю на Небесі́ Престо́лу Бо́жию ны́не предстоиши и да́нною ти свѣ́ше благода́тию, вся на́ша ну́жды и проше́ния зриши и мно́гая чудеса́ источа́еши!

Умоли́ Всеще́драго Бо́га на́шего, проше́ние нам во гресѣ́х дарова́ти, боля́щия исцели́, печальныя уте́ши и вездѣ́ тепле́ призыва́ющия тя и к ра́це честны́х и многоцелѣ́бных моще́й твои́х усер́дно припада́ющих и моля́щих ти́ ся́ от вся́ких напа́стей и бед моли́твами твои́ми изба́ви.

Ты, блаженная ма́ти, любо́вию Христо́вою преиспо́лненная, во всем житі́и твоёмъ бли́жним, себѣ забыва́ющи, послужи́ла еси́ и мно́гия ко Христу́ моли́твами твои́ми обрати́ла еси́.

Преста́вленная от сегó вре́меннаго житія́ во ино́е, вѣ́чное, радуе́шися ны́не, уго́днице Бо́жия, в лице́ святы́х сла́вимая.

Вѣ́мы, я́ко ве́лие дерзнове́ние има́ши ко Влады́це Христу́ и, ели́ко а́ще испро́сиши от Него́, да́стся нам, я́ко ты не мерт́ва еси́, но жива́ в Бо́зе.

Вонми́ гла́су моле́бному, тебе́ пред ра́цей священны́х моще́й твои́х, ны́не смире́нно возно́симо́му: укре́пи на́с малоду́шных в ве́ре, да поне́ отны́не, во обновле́нии ду́ха и в любві́ Бо́жии пребыва́ющи, Го́сподеви и бли́жним служа́ще, по отше́ствии из житія́ сегó, дости́гнем Ца́рствія Небе́снаго со все́ми уго́дившими Бо́гу. **А**ми́нь.